

四庫全書

子部

欽定四庫全書

子部

西山讀書記卷十一

詳校官中書臣孫球

刑部郎中_臣許兆椿覆勘

總校官庶吉士臣侍朝

校對官中書臣張塤

謄錄監生臣王會燕

欽定四庫全書

西山讀書記卷十一

宋 真德秀 撰

父子

書舜典慎徽五典五典克從

書皋陶謨天敘有典敕我五典五惇哉天秩有禮自我
五禮有庸哉

孔氏曰敘次敕正惇厚秩序也○張子曰生有先後

所以為天敘小大高下相並而相形焉是謂天秩知
序然後經正知秩然後禮行○蘇氏曰父義母慈兄
友弟恭子孝皆出於民性之自然為此敘者非天乎
我特從而正之使益厚耳此論當矣其論五禮則以
鳥獸悲歡言之是雜以情言也今不取○又按五禮
孔子以為公侯伯子男先儒又以為吉凶軍賓嘉近
世蔡氏曰敘者君臣父子夫婦兄弟朋友之倫敘秩
者尊卑貴賤等級隆殺之品秩於義為得

孝經子曰父子之道天性君臣之義父母生之續莫大焉君親臨之厚莫重焉故不愛其親而愛他人者謂之悖德不敬其親而敬他人者謂之悖禮

朱子曰君臣之義下當有錯簡○愚按此章蓋謂父子之道本於天性之自然父子之道即君臣之義也父母生我者也我則嗣續乎父母者天性之恩孰大焉君之臨臣父之臨子所以治而教之也其厚乎我孰重焉合君親而並言以見父子君臣其義一也世

以父子為天君臣為人者誤矣下文獨言親者蓋指天性之最切者知愛敬乎親則知愛敬乎君矣

孟子曰人之所不學而能者其良能也所不慮而知者其良知也

朱子曰良者本然之善也程子曰良知良能皆無所由乃出於天不係於人

孩提之童無不知愛其親也及其長也無不知敬其兄也

孩提二三歲之間知孩笑可提抱者也愛親敬長所謂良知良能者也

親親仁也敬長義也無他達之天下也

言親親敬長雖一人之私然達之天下無不同者所以為仁義也○南軒張氏曰良云者有本然之義有善之義蓋其本然者無非善也不學而能不慮而知則無一毫人為加乎其間天之所為而性之所有也孩提知愛其親及長知敬其兄此其知豈待於慮乎

其能豈待於學乎此所謂良知良能也然下文獨言
知者蓋知常在先也愛敬者良心之大端蓋親親為
仁敬長為義人道不越是而已能存是心而達之則
仁義之道不可勝窮矣○愚按達之天下二先生之
說少異當詳之

莊子孔子曰天下有大戒二命也義也子之愛親命也
不可解於心臣之事君義也無適而非君也無所逃於
天地之間

朱子曰莊周云云古今以為名言然以予觀之父子之仁君臣之義莫非天賦之本然民彝之固有彼乃獨以父子為自然而謂君臣之相屬特出於事勢之不得已夫豈然哉一按莊子之引孔子蓋假設之詞又朱子曰程子所謂性中只有仁義禮智曷嘗有孝弟來蓋父子之親兄弟之愛在性中只謂之仁君臣之分朋友之交在性中只謂之義推此言之曰禮曰智無不然者○愚按仁義禮智信之性古人謂之五

常君臣父子夫婦昆弟朋友之道古人亦謂之五常以性之體而言則曰仁義禮智信以性之用而言則曰君臣之義父子之仁夫婦之別長幼之序朋友之信其實則一而已天下豈有性外之理哉後世儒者乃曰立君臣等上下使父子有禮六親有紀非天之所為乃人之所設而近世復有以為事君父兄出於聖人之所使而制為拜跪之禮以率之者其昧於本原不亦甚哉○以上言天性之本然

晏子曰君令臣共父慈子孝兄愛弟敬夫和妻柔姑慈婦聽禮也君令而不違臣共而不貳父慈而教子孝而箴兄愛而友弟敬而順夫和而義妻柔而正姑慈而從婦聽而婉禮之善物也

愚按令者出令者也不能出令則非君矣然必不違於理然後可行臣之事君以其為本又必秉心誠一然後可貴令而違則有悖入之患共而貳則有飾貌之偽父慈而不能教則陷子於敗子孝而不能箴則

陷父於惡兄能愛弟矣又必有切磋之益如朋友然弟能敬兄矣然禮勝則離故以順濟之夫本剛故貴以和若柔懦暗弱反受制於婦人不得謂之和矣故又主之以義妻本於柔必守之以正而後無邪僻之失從謂姑從其婦聽謂婦聽於姑自父子至夫婦皆二德相濟惟姑一於慈而從婦一於聽而婉婦姑相與外此則他道也此十者於禮為至善晏子之言真有關於世教哉

禮運父慈子孝兄良弟弟夫義婦聽長惠幼順君仁臣忠十者謂之人義

中庸天下之達道五所以行之者三曰君臣也父子也夫婦也昆弟也朋友之交也五者天下之達道也知仁勇三者天下之達德也所以行之者一也

朱子曰達道者天下古今所共由之路即書所謂五典孟子所謂父子有親君臣有義夫婦有別長幼有序朋友有信是也知所以知此也仁所以體此也勇

所以強此也謂之達德者天下古今所同得之理也
一則誠而已矣達道雖人所共由然無是三德則無
以行之達德雖人所同得然一有不誠則人欲間之
而德非其德矣程子曰所謂誠者正是誠實此三者
三者之外更別無誠

大學為人君止於仁為人臣止於敬為人子止於孝為
人父止於慈與國人交止於信

朱子曰父所以慈子所以孝蓋父子本同一氣只是

一人之身分成兩箇其恩愛相屬自有不期然而然者其他大倫皆然皆天理使之如此豈容強為哉

以上通論

孔子曰君子之事親孝故忠可移於君事兄弟故順可移於長居家理故治可移於官是故行成於內而名立於後世矣

此章言事親事兄

子夏曰賢賢易色事父母能竭其力事君能致其身與

朋友交言而有信雖曰未學吾必謂之學矣

朱子曰賢人之賢而易其好色之心好善有誠也致
猶委也委致其身謂不有其身也四者皆人倫之大
者而行之必盡其誠學求如是而已故子夏言有能
如是之人苟非生質之美必其務學之至雖或以為
未嘗學我必謂之已學也○此章兼言事君親交朋
友

樂其子曰民生於三事之如一父生之師教之君食之

非父不生非食不長非教不知生之族也故一事之唯其所在則致死焉報生以死報賜以力人之道也

按國語晉武公伐翼殺哀侯止欒共子曰苟無死吾以子見天子令子為上卿制晉國之政辭曰成聞之云云臣敢以私利廢人之道君何以訓矣遂鬪而死韋氏曰欒共子晉哀侯大夫共叔成也如一服勤至死也族類也一事之事之如一也在君父為君父在師為師賜惠也○愚按生之族也謂君之養已師之

教已與生我之恩同類也報生以死謂君父師報賜以力謂他人之有賜於我者

曲禮曰事親有隱而無犯左右就養無方服勤至死致喪三年

鄭氏曰隱謂恐傷親意情有不盡無犯顏而諫左右謂扶持之方猶常也子則然勤勞辱之事致謂戚容稱其服也凡此以恩為制

事君有犯而無隱左右就養有方服勤至死方喪三年

無隱君臣尚義雖盡情以諫可也有方不可侵官方
喪資於事父凡此以義為制

事師無犯無隱左右就養無方服勤至死心喪三年

無犯無隱言雖盡情猶微而婉心喪戚容如父而無
服凡此以恩義之間為制○以上言事父君師

父之讎弗與共戴天

鄭氏曰父者子之天殺已之父與共戴天非孝子也
行求殺之乃止

金史卷之二十一
兄弟之讎弗反兵

恒執殺之備

交遊之讎弗同國

讎不吾避則殺之交遊或為朋友又周禮調人凡和
難父之讎辟諸海外兄弟之讎辟諸千里之外從父
兄弟之讎不同國國君之讎眡父師長之讎眡兄弟
主友之讎眡從父兄弟○鄭氏曰和之使辟於此不
得就而仇之主大夫君也蓋調人掌司萬民之難而

諧和之故有讎者使之相避是又一義也

檀弓子夏問於孔子曰居父母之讎如之何夫子曰寢苦枕干不仕

鄭氏曰雖除喪居處猶若喪也

弗與共天下也遇諸市朝不反兵而鬪

言雖適市朝不釋兵

曰請問居昆弟之仇如之何曰仕弗與共國銜君命而使雖遇不鬪

為負而廢君命

曰請問居從父昆弟之仇如之何曰不為魁主人能則執兵而陪其後

魁猶首也○以上言復君父昆弟之讎

程子曰學者先須識仁仁者渾然與物同體義禮智皆仁也

下文云識得此理以誠敬存之而已不須防檢不須窮索若心懈則有防心苟不懈何防之有理有未得

故須窮索存久自明安待窮索此道與物無對大不足
以明之天地之用皆我之用孟子言萬物皆備於
我須反身而誠乃為大樂若反身不誠則猶是二物
有對以已合彼終未有之又安得樂訂頑意思乃備
言此體以此意存之更有何事必有事焉而勿正心
勿忘勿助長未嘗致纖毫之力此其存之之道若存
得便合有得蓋良知良能不喪失以昔日習心未
除故須存養此心久則可奪舊習此理至約惟患不

能守既能體之而樂亦不患不能守也○朱子曰明
道學者須先識仁一段說話極好只是說得太廣學
者難入

程子曰觀雞雛可以觀仁

或問云云何也朱子曰凡物皆可觀此偶見雞雛而
言耳小小之物生理悉具○問雞雛如何是仁道夫
曰先生嘗謂初與嫩底便是先生曰如此看較分明
蓋當是時飲啄自如未有所謂爭鬪侵陵之患只此

便是仁也

切脈最可體仁

人問何也朱子曰脈理周流於一身仁之理亦是恁地

孝經仲尼間居曾子侍坐子曰參先王有至德要道以順天下民用和睦上下無怨女知之乎曾子避席曰參不敏何足以知之子曰夫孝德之本教之所由生也復坐吾語女身體髮膚受之父母不敢毀傷孝之始也立

身行道揚名於後世以顯父母孝之終也夫孝始於事親中於事君終於立身愛親者不敢惡於人敬親者不敢慢於人愛敬盡於事親而德教加於百姓刑於四海蓋天子之孝也在上不驕高而不危制節謹度滿而不溢高而不危所以長守貴滿而不溢所以長守富富貴不離其身然後能保其社稷而和其人民蓋諸侯之孝也非先王之法服不敢服非先王之法言不敢道非先王之德行不敢行是故非法不言非道不行口無擇言

身無擇行言滿天下無口過行滿天下無怨惡三者備矣然後能守其宗廟蓋卿大夫之孝也資於事父以事母而愛同資於事父以事君而敬同故母取其愛而君取其敬兼之者父也故以孝事君則忠以敬事長則順忠順不失以事其上然後能保其爵祿而守其祭祀蓋士之孝也用天之道分地之利謹身節用以養父母此庶人之孝也故自天子以下至於庶人孝無終始而患不及者未之有也

朱子曰此一節夫子曾子問答之言而曾氏門人之所記也疑所謂孝經者其本文止如此其下則雜引傳記以釋經文乃孝經之傳也經之首統論孝終始中乃數陳天子諸侯卿大夫士庶人之孝而其末結之曰故自天子以下至於庶人孝無終始而患不及者未之有也其首尾相應次第相承文勢連續脈絡通貫同是一時之言無可疑者而後人妄分以為六七章又增子曰及引詩書之文以雜乎其間使其文

意分斷間隔而讀者不復得見聖言全體大義故今
合為一章而刪去子曰者二引書者一引詩者四凡
六十一字以復經文之舊云

子曰孝子之事親也居則致其敬養則致其樂病則致
其憂喪則致其哀祭則致其嚴五者備矣然後能事親
事親者居上不驕為下不亂在醜不爭居上而驕則亡
為下而亂則刑在醜而爭則兵此三者不除雖日用三
牲之養猶為不孝也

愚謂子之事親一毫有所未盡皆不可以言致故五
者皆以致言致者用力而極其至也與中庸致中和
之致同驕亂爭三者皆惡德有一焉皆足以危辱其
親為人子不能謹行至於危辱其親則其不孝大矣
其養之末奚足道哉

論語孟懿子問孝子曰無違樊遲御子告之曰孟孫問
孝於我我對曰無違樊遲曰何謂也子曰生事之以禮
死葬之以禮祭之以禮

朱子曰無違謂不背於理○生事葬祭事親之始終具矣禮即理之節文也人之事親自始至終一於禮而不苟其尊親也至矣是時三家僭禮故夫子以是警之然語意渾然又若不專為三家發者所以為聖人之言也胡氏曰人之欲孝其親心雖無窮而分則有限得為而不為與不得為而為之均於不孝所謂以禮者為其所得為而已矣

孟武伯問孝子曰父母惟其疾之憂

朱子曰言父母愛子之心無所不至惟恐其有疾病常以為憂也人子體此而以父母之心為心則凡所以守其身者不容於不謹矣豈不可以為孝乎

子游問孝子曰今之孝者是謂能養至於犬馬皆能有養不敬何以別乎

朱子曰甚言不敬之罪所以深警之也或問父母至尊親犬馬至卑賤聖人之言豈若是其不倫乎曰此設戒之言也故特以其尊卑懸絕之甚者明之所以

深警夫能養而不敬者之罪也○坊記子云小人皆能養其親君子不敬何以辨

子夏問孝子曰色難有事弟子服其勞有酒食先生饌曾是以為孝乎

朱子曰事親之際惟色為難服勞奉養未足為孝○

程子曰告懿子告衆人者也告武伯者以其人多可憂之事子游能養而或失於敬子夏能直義而或少溫潤之色各因其材之高下與其所失而告之故不

同也

孔子曰父母在不遠遊遊必有方

朱子曰遠遊則去親遠而為日久定省曠而音問疎
不惟已之思親不置亦恐親之念我不忘也遊必有
方如已告云之東則不敢更適西欲親知已之所在
而無憂召已則必至而無失也○范氏曰子能以父
母之心為心則孝矣○內則曰親在出不易方復不
過時

禮記凡為人子之禮冬溫而夏清昏定而晨省在醜夷
不爭

正義曰朋儕等輩喜爭勝負亡身及親故誠之以不
爭示民不敢專也

為人子者出必告反必面

鄭氏曰告面同爾反言面者從外來宜知親之顏色
安否

所遊必有常所習必有業恒言不稱老

廣敬

為人子者居不主奧坐不中席行不中道立不中門
謂與父同宮者也不敢當其尊處室中西南隅謂之
奧道有左右中門謂棖闌之中央正義曰奧者室內
西南隅也室嚮南戶近東南角則西南隅隱奧無事
常推尊者於閑樂無事之處故尊者居必主奧也既
尊者所居則人子不宜處之也共坐則席端為上獨
坐則席中為尊尊者宜獨不與人共則坐常居中故

卑者坐不得居中也尊者常正路而行卑者故不得也中央有闌闌旁有棖棖闌之中尊者所行故人子不得當之而行又曰凡上四事皆謂與父同宮者若命士以上父子異宮則不禁所以爾者有命既尊各有臣僕子孫應敬已故也

食饗不為槩

槩量也不制待賓客饌具之所有正義曰由尊者所裁子不得限量多少

祭祀不為尸

尊者之處為其失子道然則尸卜筮無父者

聽於無聲視於無形

常若親之將有教使然

不登高不臨深不苟訾不苟笑

為其近危辱也

孝子不服闇不登危懼辱親也父母存不許友以死

為忘親也死為報讎

不有私財

坊記云父母在不敢有其身不敢私其財示民有上下也

父母在饋獻不及車馬

父召無諾

玉藻父命呼唯而不諾手執業則投之食在口則吐之走而不趨

子云父母在不言老言孝不言慈閨門之內戲而不嘆

鄭氏曰孝上施言慈則嫌下流也戲謂人子言笑者也孟子曰舜五十而不失孺慕之心歎謂有憂戚之聲○愚按言孝不言慈謂人子以孝自勉而不敢以慈望其親故言不及之戲而不歎老萊子是也

孝子之有深愛者必有和氣有和氣者必有愉色有愉色者必有婉容

朱子曰愛根於心故其形見於外如此

孝子如執玉如奉盈洞洞屬屬然如弗勝如將失之

上言愛下言敬故曰愛敬盡於事親

嚴威儼恪非所以事親也

四者容貌非事親之體事親當和順卑柔

曾子曰孝子之事親也樂其心不違其志樂其耳目安其寢處以其飲食忠養之是故父母之所愛亦愛之父母之所敬亦敬之至於犬馬盡然而況於人乎

鄭氏曰上言其近親者下言親所愛敬者○張子曰親之故舊所喜者當極力招致以悅其親凡於父母

賓客之奉必極力營辦不計家之有無又須使親不
知其勉強勞苦苟使見其為而不易則亦不安矣

孔子曰仁人之事親也如事天事天如事親

鄭氏曰事親事天孝敬同也

孟子曰曾子養曾皙必有酒肉將徹必請所與問有餘
必曰有曾皙死曾元養曾子必有酒肉將徹不請所與
問有餘曰亡矣將以復進也此所謂養口體者也若曾
子則可謂養志也事親若曾子者可也

程子曰事親若曾子可也未嘗以曾子之孝為有餘也蓋子之身所能為者皆所當為也○以上言事親大意

后皇命冢宰降德於衆兆民子事父母

司馬氏曰孫事祖父母同

雞初鳴咸盥漱

朱子曰咸皆也盥謂洗手漱謂漱口

櫛縱笄總拂髦冠綏纓

櫛梳也。縱黑繒韜髮而結之也。笄者橫施於髻中以固髮也。總裂練繒以束髮也。拂謂振去塵也。髦用髮為之。象幼時髻纓者結之。頷下以固冠結之餘者散而下垂謂之綏。

端韠紳搢笏

端玄端士服也。庶人深衣韠蔽膝也。以韋為之。與裳同色。上繫之革帶。紳大帶也。搢猶扱也。扱笏於紳笏所以記事也。○溫公曰。今用帽子衫帶。

左右佩用

紛悅刀礪觿燧之屬備尊者使令也

偁屨著綦

偁行膝也綦屨繫也屨頭施繫以為行戒

婦事舅姑

溫公曰孫婦亦同

如事父母雞初鳴咸盥漱櫛緹笄總衣紳左右佩用衿
纓綦屨

衿其鵠反○衿猶結也婦人有纓示繫屬也溫公曰
今田冠子背子

以適父母舅姑之所及所下氣怡聲問衣煥寒疾痛疴
養而敬抑搔之

怡悅也疴疥也抑按也搔摩也溫公曰丈夫唱喏婦
人道萬福問侍者夜安否則侍者以告晨興復問則
侍者以告此即禮之晨昏也顏延之曰父子之嚴不
可以狎骨肉之愛不可以簡簡則慈孝不接狎則怠

慢生焉由命士以上父子異宮此不狎之道也抑搔
癢痛懸衾篋枕此不簡之教也

出入則或先或後而敬扶持之

先後隨時便也

進盥少者奉槃長者奉水請沃盥盥卒授巾

槃承盥水者巾以悅手

問所欲而敬進之柔色以溫之父母舅姑必嘗之而後
退

溫於運反○所欲如饘粥酒醴飲食之類溫藉也承尊者必和顏色溫公曰父母舅姑起子供藥物婦具晨羞尊長舉箸子婦乃各退就食注曰藥物乃闕身之切務人子當親自檢數調煮供進不可但委婢僕脫若有誤即其禍不測晨羞俗謂點心易曰在中饋詩云惟酒食是議凡烹調飲膳婦人之職也近年婦女驕倨皆不肯入庖厨今縱不親執刀匕亦當檢校監視務令精潔

男女未冠笄者雞初鳴咸盥漱櫛縱拂髦總角衿纓皆佩容臭昧爽而朝

總角收髮結之容臭香物也以纓佩之為迫尊者給小使也昧爽欲明未明之時

問何食飲矣若已食則退若未食則佐長者視具具饌也

凡內外雞初鳴咸盥漱衣服欽枕簟灑掃室堂及庭布席各從其事父母舅姑將坐奉席請何鄉將衽長者奉

席請何趾少者執牀與坐

此總論子婦之外僕隸之等祗即席也將祗謂更卧處順尊者所安也

御者舉几歛席與簞縣衾蔭枕歛簞而褥之

褥音獨○早旦親起侍御之人舉几以進使馮之蔭謂以篋貯之褥謂以褥韜之須卧而鋪之也

父母舅姑之衣衾簞席枕几不傳杖屨祗敬之勿敢近敦牟卮匱非餽莫敢用與恒食飲非餽莫之敢飲食

敦音對牟木侯反卮音支匱羊支反餽音俊○傳移也謂此數者每日置之有常處子與婦不得輒移置他處杖屨服御之重者彌須恭敬勿敢迫近也敦今盃盃也牟土釜也今以木為器象土釜之形卮酒器也匱盛酒漿之器餽尊長食餘也與及也恒常也旦夕之常食也

在父母舅姑之所有命之應唯敬對進退周旋慎齊升降出入揖遜不敢噦噫嚏咳欠伸跛踣睇視不敢唾洩

寒不敢襲癢不敢搔不有敬事不敢袒裼不涉不擻
噦於月反噦於界反噦音帝咳苦愛反湊音替擻居
衛反○噦嘔逆之聲咳嗽聲也氣乏則欠體疲則伸
睇視傾視也湊鼻液也敬事如習射之類袒露臂也
裼去上衣也習射則袒裼若以勞倦而袒裼則為不
敬也擻揭衣也惟涉水可擻若不涉水而擻則為不
敬也

褻衣衾不見裏父母唾洩不見少事長賤事貴共帥時

帥循也時是也○以上言事親節文

子婦孝者敬者父母舅姑之命勿逆勿怠若飲食之雖不嗜必嘗而待加之衣服雖不欲必服而待

待者待父母復命而後去之也

加之事人代之已雖不欲姑與之而姑使之而後復之姑且也言尊者以事授已而又使人代之勞已雖不欲其妨已業且與為之待其休解而後復業於已身

舅沒則姑老家婦所祭祀賓客每事必請於姑

婦雖受傳猶不敢專行也

介婦請於冢婦

以其代姑之事介婦衆婦

舅姑使冢婦無怠

雖有勤勞不敢怠倦

不友無禮於介婦

衆婦無禮冢婦不友之也善兄弟爲友姊如猶兄弟

也○朱子曰友當作敢字之誤也言不敢恃舅姑之命而無禮於介婦也

舅姑若使介婦毋敢敵耦於冢婦

雖有勤勞不敢相較計今按下文三句亦是

不敢並行不敢並命不敢並坐

下冢婦也並命並有教令之命

凡婦不命適私室不敢退

婦待舅姑者也

婦將有事大小必請於舅姑子婦無私貨無私畜無私器不敢私假不敢私與

家事統於尊也

婦或賜之飲食衣服布帛佩悅茝蘭則受而獻之舅姑舅姑受之則喜如新受賜若反賜之則辭不得命如更受賜藏以待乏

待姑舅之乏

婦若有私親兄弟將與之則必復請其故賜而後與之

以上兼言婦事舅姑之禮

曾子曰孝有三大孝尊親其次弗辱其下能養公明儀問於曾子曰夫子可以為孝乎曾子曰是何言與是何言與君子所謂孝者先意承志諭父母於道參直養者也安得為孝乎

唐孔氏曰先意謂父母將欲發意孝子則預前逆知父母之意而為之承志父母已萌其志孝子則須體貼父母之志而承之諭父母於道曉諭父母歸於正

道也○愚按孝者順德本無優劣其尊親不辱能養則分天子諸侯卿大夫士庶人而言也故又云先事曉諭置父母於道皆人子之所當自致其餘次第放此

子曰事父母幾諫見志不從又敬不違勞而不怨曾子曰敢問從父之令可謂孝乎子曰是何言與是何言與昔者天子有爭臣七人雖無道不失天下諸侯有爭臣五人雖無道不失其國大夫有爭臣三人雖無道不失

其家士有爭友則身不離於令名父有爭子則身不陷於不義故當不義則子不可以弗爭於父臣不可以弗爭於君故當不義則爭之從父之令又焉得為孝乎

愚按無道而不失天下國家者蓋有爭臣爭子則於失道必爭之雖失而旋復所以免於危亡也與

禮記曾子曰父母愛之喜而弗忘父母惡之懼而無怨父母有過諫而不逆

父母有過下氣怡色柔聲以諫諫若不入起敬起孝

鄭氏曰子事父母有隱無犯起猶更也

說則復諫不說與其得罪於鄉黨州閭寧熟諫

朱子曰謂殷勤純熟而諫得罪謂使父母得罪

父母怒不說而撻之流血不敢疾怨起敬起孝

子之事親也三諫而不聽則號泣而隨之

以上言諫過

葉公語孔子曰吾黨有直躬者其父攘羊而子證之孔子曰吾黨之直者異於是父為子隱子為父隱直在其

中矣

朱子曰父子相隱天理人情之至也故不求為直而直在其中○謝氏曰順理為直父為子隱子不為父隱於理順邪瞽瞍殺人舜竊負而逃遵海濱而處當是時愛親之心勝其於直不直何暇計哉○邢氏引律大功以上得相容隱告言祖父者八十惡以為得此意善乎其推言之也

子云善則稱親過則稱已則民作孝

坊記○以上言隱過

易蠱初六幹父之蠱有子考無咎厲終吉

程子曰初六雖居最下成卦由之有主之義居內在
下而為主子幹父蠱也子幹父蠱之道能堪其事則
為有子而其考得無咎不然則為父之累故必惕厲
則得終吉也處卑而尸尊事自當惕厲以六之才雖
能巽順體乃陰柔在下無應而主幹非有能濟之義
若以不克幹而言則其義甚小故專言為子幹蠱之

道必克濟則不累其父能厲則可以終吉乃備見為
子幹蠱之大法也

象曰幹父之蠱意承考也

子幹父蠱之道意在承當於父之事也故祇敬其事
以置父於無咎之地常懷惕厲則終得其吉也盡誠
於父事吉之道也

九二幹母之蠱不可貞

九二以剛陽為六五所應是以剛陽之才在下而幹

夫在上陰柔之事也故取子幹母為義二巽體而處柔順義為多幹母之蠱之道也夫子之於母當以柔巽輔道之使得於義不順而致敗蠱則子之罪也從容將順豈無道乎以婦人言之則陰柔可知若伸已剛陽之道遽然矯拂則傷恩所害大矣亦安能入乎在乎屈已下意巽順將承使之身正事治而已故曰不可貞謂不可貞固盡其剛直之道如是乃中道也以剛陽之臣輔柔弱之君義亦相近

象曰幹母之蠱得中道也九三幹父之蠱小有悔無大咎

三以陽剛之才居下之上主幹者也子幹父之蠱以陽處剛而不中剛之過也然而在巽體雖剛過而不為無順順事親之本也又居得正故無大過以剛陽之才克幹其事雖以剛過而有小小之悔終無大過咎也然有小悔已非善事親矣

象曰幹父之蠱終无咎也

以上言幹蠱

書堯典師錫帝曰有鰥在下曰虞舜帝曰俞予聞如何
岳曰瞽子父頑母嚚象傲克諧以孝烝烝乂不格姦

東萊呂氏曰四岳稱舜可以當天下之實獨以家庭
中言之何也蓋舜瞽瞍之子父既頑母既嚚象復傲
自居死亡之地而舜克諧以孝方其始也怨怒忌克
乖爭凌犯一家之中無所不有克諧之後悉變為和
順雍穆之風烝烝二字舜之工夫在此烝烝者有薰

灌之意詩曰烝之浮浮如飢之炊炊然薪燃不斷火
薪相續則自然烝烝以至於熟舜處頑父嚚母傲象
之間苟非孝誠薰灌工夫源源安能至於不格姦之
地孔氏曰仁覆閔下謂之旻天言舜為父母所疾日
號泣于旻天及父母克己自責不責於人載事也夔
夔悚懼貌舜負罪引惡敬以事見于父悚懼齊莊父
亦信順之言能以至誠感頑父

大禹謨益贊于禹曰帝初于歷山往于田日號泣于旻

天子父母負罪引慝祇載見瞽瞍夔夔齋慄瞽亦允若
孟子曰天下大悅而將歸已視天下悅而歸已猶草芥
也惟舜為然不得乎親不可以為人不順乎親不可以
為子

朱子曰言舜視天下之歸已如草芥而惟欲得其親
而順之也得者曲為承順以得其心之悅而已順則
有以諭之於道心與之一而未始有違尤人所難能
也為人蓋泛言之為子則愈密矣

舜盡事親之道而瞽瞍底豫瞽瞍底豫而天下化瞽瞍
底豫而天下之為父子者定此之謂大孝

瞽瞍至頑嘗欲殺舜至是而底豫焉書所謂不格姦
亦允若是也蓋舜至此而有以順乎親矣是以天下
之為人子者知天下無不可事之親顧吾所以事之
者未若舜耳於是莫不勉勉而為孝至於其親亦底
豫焉則天下為父者亦莫不慈所謂化也子孝父慈
各止其所而無不安其位之意所謂定也為法於天

下可傳於後世非止一身一家之孝而已此所以為
大孝○李氏曰舜之所以能使瞽瞍底豫者盡事親
之道其為子職不見父母之非而已昔羅仲素語此
云只為天下無不是底父母了翁聞而善之曰唯如
此而後天下之為父子者定彼臣弑其君子弑其父
者常始於見其有不是處耳

萬章問曰舜往于田號泣于旻天何為其號泣也孟子
曰怨慕也萬章曰父母愛之喜而不忘父母惡之勞而

不怨然則舜怨乎曰長息問於公明高曰舜往于田則
吾既得聞命矣號泣于旻天于父母則吾不知也公明
高曰是非爾所知也夫公明高以孝子之心為不若是
忍我竭力耕田共為子職而已矣父母之不我愛於我
何哉

于父母言呼父母而泣也忍無愁之貌於我何哉自
責不知已有何罪耳非怨父母也○楊氏曰非孟子
深知舜之心不能為此言蓋舜唯恐不順於父母未

嘗自以為孝也若自以為孝則非孝矣

帝使其子九男二女百官牛羊倉廩備以事舜於畝畝之中天下之士多就之者帝將胥天下而遷之焉為不順於父母如窮人無所歸天下之士悅之人之所欲也而不足以解憂好色人之所欲妻帝之二女而不足以解憂富人之所以欲富有天下而不足以解憂貴人之所欲貴為天子而不足以解憂人悅之好色富貴無足以解憂者惟順於父母可以解憂人少則慕父母知好色

則慕少艾有妻子則慕妻子仕則慕君不得於君則熱中大孝終身慕父母五十而慕者予於大舜見之矣

言常人之情因物有遷惟聖人為能不失其本心也言五十者舜攝政時年五十五而慕則其終身慕可知矣○此章言舜不以得衆人之所欲為已樂而可以不順乎親之心為已憂非聖人之盡性其孰能之子曰孝哉閔子騫人不間於其父母昆弟之言

胡氏曰父母兄弟稱其孝友人皆信之無異詞者蓋

其孝友之實有以積於中而著於外故夫子嘆而美之○韓詩外傳子騫早喪母父娶後妻生三子疾惡子騫以蘆花衣之父察知之欲逐後母子騫啓曰母在一子寒母去三子單父喜之而止母悔改之後至均平遂成慈母○以上言事難事之親曾閔以孝並稱於聖門曾子之父皙亦幾難事者也鋤瓜誤傷而撻以大杖蓋可見矣而曾子援琴而鼓唯恐傷親之心也斯其所以為孝歟然孔子小杖則受大杖則走

之言尤人子所當知也伯奇亦類此韓文公履霜操
曰兒罪當笞逐兒何為蓋得伯奇之心者張子西銘
曰勇於從而順令者伯奇也其指尤深為人子者不
幸而事難事之親則於大舜曾閔伯奇之事可不勉
而師之乎

凱風美孝子也衛之淫風流行雖有七子之母猶不能
安其室故美七子能盡其孝道以慰其母心而成其志
爾凱風自南吹彼棘心棘心天天母氏劬勞

毛氏曰興也南風謂之凱風樂夏之長養棘難長養者天天盛貌○孔氏曰凱樂也風性樂養萬物○王氏曰棘心至於天天則風之為力多矣此母氏劬勞之譬○朱子曰此詩以凱風比母棘心比子之幼時蓋曰母生衆子幼而育之其劬勞甚矣本其始而言以起自責之端也

凱風自南吹彼棘薪母氏聖善我無令人

興也毛氏曰棘棗也可以為薪聖叡也鄭氏曰令善

也○朱子曰棘可以為薪則成矣然非美才故以興
子之壯大而無善也○長樂劉氏曰自言七子之中
有一令善之人則母亦不舍之而去也

爰有寒泉在浚之下有子七人母氏勞苦

興也毛氏曰浚衛邑也○陳氏曰寒泉在浚之下邑
人賴之以生養今子七人反不能養一母而使母勞
苦求嫁也○朱子曰母以淫風流行不能自守而諸
子自責但以不能事母使母勞苦為詞婉詞幾諫不

顯其親之惡可謂孝矣

睨睨黃鳥載好其音有子七人莫慰母心

朱子曰興也睨睨清和圓轉之意○言黃鳥猶能好其音以悅人而我七子獨不能慰悅母心哉○曾氏曰凱風盛於夏時黃鳥鳴於夏木寒泉亦夏所宜寒泉能使人甘之有子而使母勞苦黃鳥能使人樂之有子而莫慰母心○愚按此又處事親之變而能盡其道者也故以次於前章之後

公孫丑問曰高子曰小弁小人之詩也孟子曰何以言之曰怨

朱子曰高子齊人也小弁小雅篇名周幽王娶申后生太子宜臼又得褒姒生伯服而黜申后廢宜臼於是宜臼之傳為作此詩以叙其哀痛迫切之情○按小弁詩所謂民莫不穀我獨于罹何辜于天我罪伊何靡瞻匪父靡依匪母不屬于毛不離于裏凡皆怨辭也

曰固哉高叟之為詩也有人於此越人闕弓而射之則已談笑而道之無他疏之也其兄闕弓而射之則已垂涕泣而道之無他戚之也小弁之怨親親也親親仁也固矣夫高叟之為詩也曰凱風何以不怨曰凱風親之過小者也小弁親之過大者也親之過大而不怨是愈疏也親之過小而怨是不可磯也愈疏不孝也不可磯亦不孝也

磯水激石也不可磯言微激之而遽怒也

孔子曰舜其至孝矣五十而慕

言舜猶怨慕小弁之怨不為不孝○趙氏曰生之膝下一體而分喘息呼吸氣通於親當親而疏怨慕號天是以小弁之怨未足為愆也○或問五十而慕何必舜武夷胡氏曰所謂慕者不變其初心也初心者赤子之心也為舜父母日欲殺舜與他人父母不同故獨言舜耳此一節文當與前章參玩云○又晉獻公將廢太子申生里克諫不聽太子曰吾其廢乎里

克曰子懼不孝不懼不得立修已而不責人則免於難君子曰善處父子之間季武子立其愛子悼子而以長子公鉏為馬正公鉏愠而不出閔子馬見之曰子無然禍福無門唯人所召為人子者患不孝不患無所敬共父命何常之有若能孝敬富倍季氏可也姦回不軌禍倍下民可也公鉏然之敬共朝夕恪居官次季孫果喜而厚之為人子者不幸而處愛憎興廢之間則於里克閔子馬之言可不念之哉

子曰父母之年不可不知也一則以喜一則以懼

南軒曰以年之盛衰察氣之強弱亦人子盡其心於親之一事也

曾子曰親戚不悅不敢外交近者不親不敢求遠小者不審不敢言大故人之生也百歲之中有疾病焉有老幼焉故君子思其不可復者而先施焉親戚既沒雖欲孝誰為孝年既耆艾雖欲悌誰為悌故孝有不及悌有不時病加於小愈禍生於懈惰孝衰於妻子察此四者

慎終如始詩曰靡不有初鮮克有終

楊子曰父母子之天地與事父母自知不足者其舜乎
不得而久者事親之謂也孝子愛日

以上三章大指畧同皆欲及時以致養

禮記父母有疾冠者不櫛行不翔言不惰琴瑟不御食
肉不至變味飲酒不至變貌笑不至矧怒不至詈疾止
復故

矧齒本也曲禮下同

君有疾飲藥臣先嘗之親有疾飲藥子先嘗之醫不三世不服其藥

親瘠色容不盛此孝子之疏節也

鄭氏曰言未足為至孝也○愚按此特末節而猶不能盡其為不孝可知以上言侍疾又按春秋昭十九年夏五月戊辰許世子止弑其君買胡氏曰左傳許悼公瘞飲世子止之藥卒書曰弑其君者止不嘗藥也古者醫不三世不服其藥夫子之所謹者三疾居

其一季康子饋藥子曰丘未達不敢嘗敬謹其身如此也而於君父可忽乎君有疾飲藥臣先嘗之父有疾飲藥子先嘗之蓋言謹也止不擇醫而輕用其藥藥不先嘗而誤進於君是有忽君父之心而不慎矣此篡弑之萌堅冰之漸而春秋之所謹也故加以大惡而不得辭此春秋除惡於微之意也又曾幾言許世子弑君事如律造御舟誤不牢合御藥誤不如本方皆死胡氏曰極是○程子曰事親者不可以不知

醫○司馬氏曰凡父母舅姑有疾子婦無故不離側
親調嘗藥餌而供之父母有疾子色不滿容不戲笑
不宴游捨置餘事專以迎醫檢方製藥為務顏氏家
訓曰父母有疾子拜醫以求藥蓋以醫者親之存亡
所繫豈可忽也

陟岵孝子行役思念父母也國迫而數侵削役乎大國
父母兄弟離散而作是詩也陟彼岵兮瞻望父兮父曰
嗟予子行役夙夜無已上慎旃哉猶來無止

陳氏曰岵也岵也岡也皆山之高處可以瞻望○孔氏曰我欲行之時父教戒我曰嗟我子從軍行役之時當早起夜寐無得已止○蘇氏曰上猶尚也孝子登高以望其父而不見則思其將行之戒以自慰○朱子曰尚庶幾慎之哉猶可以來歸無止於彼而不來蓋生則必歸死則止而不來矣

陟彼岵兮瞻望母兮母曰嗟子季行役夙夜無寐上慎旃哉猶來無棄

毛氏曰季少子也無寐無耆寐○王氏曰尤愛憐少
子者婦人之情○呂氏曰母尚恩故曰無棄言無棄
母而不歸也

陟彼岡兮瞻望兄兮兄曰嗟予弟行役夙夜必偕上慎
旃哉猶來無死

蘇氏曰必與同役者偕無獨行也○魏風

鵲羽刺時也昭公之後大亂五世君子下從征役不得
養其父母而作是詩也肅肅鵲羽集于苞栩王事靡盬

不能執稷黍父母何怙悠悠蒼天曷其有所

毛氏曰肅肅鵠羽聲也鵠之性不樹止也又曰鵠似雁而大無後趾集止也孔氏曰物叢生曰苞毛氏曰叢也孔氏曰桐柞櫟也其子為皂可以染毛氏曰監不攻綴也孔氏曰監與蠱字異義同左氏於文皿蟲為蠱穀之飛亦為蠱然則蠱害器以敗穀者皆謂之蠱是監不堅牢不攻綴之意也執樹也稷黍禾屬毛氏曰怙恃也鄭氏曰曷何也君子久從征役以王事

之靡盬致子職有缺不能播種五穀我父母何所怙
恃而得養悠悠蒼天何時使我得其所乎不得已則
告天也

肅肅鵠翼集于苞棘王事靡盬不能藝黍稷父母何食
悠悠蒼天曷其有極

蘇氏曰極止也范氏曰曷其有極言勞役之無已也
肅肅鵠行集于苞桑王事靡盬不能藝稻粱父母何嘗
悠悠蒼天曷其有常

蘇氏曰行列也朱氏曰嘗食也范氏曰思得休息以
反其常也○唐風

北山大夫刺幽王也役使不均已勞于王事而不得養
其父母焉其一章曰陟彼北山言采其杞偕偕士子朝
夕從事王事靡盬憂我父母

李氏曰杞枸杞也毛氏曰偕偕彊壯貌朱氏曰大夫
從役陟彼北山采杞而食也毛氏曰士子有王事者
也鄭氏曰朝夕從事言不得休息朱氏曰言以王事

而貽親憂也二章以下皆言役使不均之意今不錄
蓼莪刺幽王也民人勞苦孝子不得終養爾

李氏曰凱風母不安其室之詩也小弁太子見棄之
詩也蓼莪孝子不得終養之詩也故其咎責怨慕哀
痛如此苟不為母所棄為父所逐不困於行役而得
終養則其歡欣可知矣觀詩者當以此類求之

蓼莪者莪匪莪伊蒿哀哀父母生我劬勞

毛氏曰蓼莪長大貌歐陽氏曰周人苦於勞役不得

養其父母者見彼蓼蓼然長大者非我即蒿皆草木之微者其茂盛如此曰天地生育之功也思我之生也父母之養育我者亦劬勞矣而我不得終養以報也○呂氏曰我蒿不能離天地之生育猶人子不能報父母之劬勞也孟郊詩云誰言寸草心報得三春暉

蓼蓼者莪匪我伊蔚哀哀父母生我勞瘁

鄭氏曰瘁病也

餅之罄矣維壘之耻鮮民之生不如死之久矣無父何怙無母何恃出則銜恤入則靡至

毛氏曰餅小而壘大王氏曰餅譬則民也壘譬則君也餅之罄則壘之耻民之窮則君之羞○呂氏曰鮮猶窮獨之義言窮獨而從役其生不如死也○孔氏曰所以然者以無父何所依怙無母何所倚恃也

劉氏曰出則銜無窮之憂曾氏曰入則靡至無所歸投也○孔氏曰已無父母則中心銜憂旋來入門則

堂宇空曠不復覩見是其所以悲恨也

父兮生我母兮鞠我拊我畜我長我育我顧我復我出入腹我欲報之德昊天罔極

毛氏曰鞠養也孔氏曰拊拊循也朱氏曰畜亦養也鄭氏曰育覆育也顧旋視也復反覆也腹懷抱也父兮生我者本其生氣也○李氏曰拊我畜我而下皆重言生育之恩也朱氏曰父母之恩如此欲報之以德而父母之恩如天之無窮不知所以為報也

南山烈烈飄風發發民莫不穀我獨何害

王氏曰烈烈氣之寒毛氏曰發發疾貌鄭氏曰穀善也蘇氏曰虐政之病人如大寒之視南山而聞飄風王氏曰民莫不穀我獨何害傷已獨不得終養也朱氏曰我獨何為遭此害也

南山律律飄風弗弗民莫不穀我獨不卒

王氏曰南山之勢律律蓋萃律之謂也毛氏曰律律猶烈烈也弗弗猶發發也○鄭氏曰卒終也我獨不

得終養父母重自哀傷也。○以上四詩皆為行役不得養親而作。然陟岵鵲羽北山親猶在也。若蓼莪則父母已終無所復及矣。故其辭悲痛特甚焉。晉王裒以父不得其死。隱居教授廬於墓側。攀栢悲號。樹為之枯。讀詩至哀哀父母。生我劬勞。未嘗不三復流涕。門人受業者。為廢蓼莪之篇。詩之感人。蓋如此。古之君子。迫於王事。不得盡力於其親。故形之歌咏。極其慘愴。後世兵民既分。自非行伍之士。無長征遠戍者。

優游親側足以自竭顧乃有不知劬勞之當報者亦
獨何哉誦此詩者可以悚然知媿矣

孝經子曰孝子之喪親也哭不偯

唐玄宗注曰氣竭而息聲不委曲

禮無容言不文服美不安聞樂不樂食旨不甘此哀感
之情也三日而食教民無以死傷生毀不滅性此聖人
之政也喪不過三年示民有終也為之棺槨衣衾而舉
之陳其簋簠而哀感之擗踊哭泣哀以送之卜其宅兆

而安厝之為之宗廟以鬼饗之春秋祭祀以時思之生事愛敬死事哀感生民之本盡矣死生之義備矣孝子之事親終矣

宰我問三年之喪期已久矣

朱子曰期周年也

君子三年不為禮禮必壞三年不為樂樂必崩

恐居喪不習而崩壞也

舊穀既沒新穀既升鑽燧改火期可已矣

沒盡也升登也燧取火之木也改火春取榆柳之火
夏取棗杏之火夏季取桑柘之火秋取柞櫟之火冬
取槐檀之火亦一年而週也已止也言期年則天運
一週時物皆變喪至此可止也尹氏曰短喪之說下
愚且耻言之宰我親學聖人之門而以是為問者有
所疑於心而不敢強焉爾

子曰食夫稻衣夫錦於女安乎曰安

禮父母之喪既殯食粥麤衰既塋疏食水飲受以成

布期而小祥始食菜羹練冠緇緣要經不除無食稻
衣錦之理夫子欲宰我反求諸心自得其所以不忍
者故問之以此而宰我不察也

女安則為之夫君子之居喪食旨不甘聞樂不樂居處
不安故不為也今女安則為之

此夫子之言也旨亦甘也初言女安則為之絕之之
辭又發其不忍之端以警其不察而再言女安則為
之以深責之也

宰我出子曰予之不仁也子生三年然後免於父母之懷夫三年之喪天下之通喪也予也有三年之愛於其父母乎

宰我既出夫子懼其真以為可安而遂行之故深探其本而斥之言由其不仁故愛親之薄如此也懷抱也又言君子所以不忍於親而喪必三年之故使之聞之或能反求而終得其本心也○范氏曰喪雖止於三年然賢者之情則無窮也特以聖人為之中制

而不敢過故必俯而就之非以三年之喪為足以報其親也所謂三年然後免於父母之懷特以責在我之無恩欲其有以跂而及之爾

曾子曰吾聞諸夫子人未有自致者也必也親喪乎

南軒曰人於他事未能自盡於親喪豈可不自盡乎若於此不能自盡則何事能盡若於此能自盡則於其他亦推是心而已

禮記始死充充如有窮既殯瞿瞿如有求而弗得既塋

皇皇如有望而弗至

鄭氏曰皆憂懼在心之貌○檀弓

顏丁善居喪始死皇皇焉如有求而弗得及殯望望焉如有從而弗及既葬慨然如不及其反而息

縣子曰三年之喪如斬期之喪如剡

鄭氏曰言其痛之惻怛有淺深也○雜記

孔子曰少連大連善居喪三日不怠三月不懈期悲哀三年憂東夷之子也

鄭氏曰言其生於夷狄而知禮也愚謂夫子言此所以警中國之不知禮者○雜記

高子臯之執親之喪也泣血三年未嘗見齒君子以為難○檀弓

曾申問於曾子曰哭父母有常聲乎曰中路嬰兒失其母焉何常聲之有○雜記

弁人有其母死而孺子泣者孔子曰哀則哀矣而難為繼也夫禮為可傳也為可繼也○檀弓

曾子謂子思曰伋吾執親之喪也水漿不入口者七日
子思曰先王之制禮也過之者俯而就之不至焉者跂
而及之故君子之執親之喪也水漿之不入口者三日
杖而后能起

樂正子春之母死五日而不食曰吾悔之自吾母而不
用吾情吾烏乎用吾情○檀弓

居喪之禮毀瘠不形視聽不衰

鄭氏曰為其廢喪事形謂骨立

升降不由阼階出入不當門隧

常若親存隧道也

居喪之禮頭有創則沐身有瘍則浴有疾則飲酒食肉疾止復初不勝喪乃比於不慈不孝

喪食雖惡必充飢飢而廢事非禮也飽而忘哀亦非禮也視不明聽不聰行不正不知哀君子病之○雜記毀而死君子謂之無子○同上

喪不慮居為無廟也毀不危身為無後也

檀弓○皆為親非為已也合前後數章而觀則居喪之道可知矣

子思曰喪三日而殯凡附於身者必誠必信勿之有悔焉耳三月而葬凡附於棺者必誠必信勿之有悔焉耳鄭氏曰言其日月欲以盡心修備之附於身謂衣衾附於棺謂明器之屬○檀弓下同

子游問喪具夫子曰稱家之有無子游曰有無惡乎齊夫子曰有毋過乎禮苟亡矣斂首足形還葬

鄭氏曰形體還之言便也言已斂葬不待三月

縣棺而封人豈有非之者哉

不設碑緯不備禮樂當為窆窆下棺也

子路曰傷哉貧也生無以為養死無以為禮也孔子曰啜菽飲水盡其歡斯之謂孝斂首足形還葬而無槨稱其財斯之謂禮

孟子曰養生者不足以當大事惟送死可以當大事

朱子曰事生固當愛敬然亦人道之常耳至於送死

則人道之大變孝子之事親舍是無以用其力矣故尤以為大事而必誠必信不使少有後日之悔也

孟子自齊莖於魯反於齊止於嬴充虞請曰前日不知虞之不肖使虞敦匠事嚴虞不敢請今願竊有請也木若以美然曰古者棺槨無度中古棺七寸槨稱之自天子達於庶人非直為觀美也然後盡於人心不得不可以為悅無財不可以為悅得之為有財古之人皆用之吾何為獨不然且比化者無使土親膚於人心獨無忤

乎

朱子曰比猶為也化者死者也較快也言為死者不使土近其肌膚豈不快然無所恨乎

吾聞之也君子不以天下儉其親

送終之禮所當得而不自盡是為天下愛惜此物而薄於吾親也○又魯平公將見孟子嬖人臧倉者曰禮義由賢者出孟子之後喪踰前喪君無見焉公曰諾樂正子入見曰君奚為不見孟軻也曰或告寡人

曰孟子之後喪踰前喪是以不往見也曰何哉君所謂踰者前以士後以大夫前以三鼎而後以五鼎與曰否謂棺槨衣衾之美也曰非所謂踰也貧富不同也○今按子思必誠必信以下數章及孟子此章之指則聖賢之於其親心無不盡而其禮則以貧富有無為別學者觀此知所取法矣○按司馬氏論墓曰孝經云卜其宅兆而安厝之謂卜地決其吉凶耳非若今陰陽家相其山岡風水也國子高曰墓者藏也

又曰死則擇不食之地而葬我焉明無地不可葬也
古者天子七月諸侯五月大夫三月士踰月而葬蓋
以會葬者遠近有差不得不然也然禮文多云三月
而葬蓋舉其中制而言之按春秋己丑葬敬嬴雨不
克葬庚寅日中而克葬丁巳葬定公雨不克葬壬午
日下昃乃葬何嘗擇年月日時也葬於北方北首何
嘗擇地也今世俗信葬師之說以為子孫之貧富貴
賤賢愚壽夭盡繫於此議論紛紜不決至有終身不

塋累世不塋者使殯塋實能致人禍福為子孫者豈
忍暴露其親而自求利耶悖禮傷義無過於此然孝
子之心慮患深遠恐淺則為人所指深則濕潤速朽
故必擇土厚水深之地而塋之所擇必數處者以備
卜之不吉故也或曰世人久未塋者非盡以陰陽拘
忌之故亦以貧故也予曰孔子有云斂首足形還塋
而無槨稱其財之謂禮又子游問喪具孔子云云昔
廉范千里負喪郭原平自賣營墓豈待豐富而後塋

哉在禮未塋不變服食粥居倚廬寢苦枕塊蓋閔親之未有所歸故寢食不安奈何舍之出仕食稻衣錦不知其何以為心哉而程子則曰卜其宅兆卜其地之美惡也地美則其神靈安其子孫盛然則曷謂地之美者土色之光潤草木之茂盛乃其驗也而拘忌者或以擇地之方位決日之吉凶甚者不以奉先為計而專以利後為慮尤非孝子安厝之用心也惟五患者不得不謹須使異日不為道路不為城郭不為

溝池不為貴勢所奪不為耕犁所及一本所謂五患者溝渠道路避村落遠井窰合二先生之言觀之以安親為心則地不可以不擇其擇也不可以太拘擇焉而不至於太拘則塋不患其不時矣然世人多遷延不塋者以昆若弟各懷自利之心而野師俗巫又從而誑惑之甚至偏納其賂而結之以私已愚而無知者安受其欺而弗悟也夫某山強則某支富某山弱則某支貧非惟禮義所不當問雖近世陰陽家書亦

有深排其說者惟野師俗巫則張皇煽惑以為取利之資擇地者必先破此謬說而後無太拘之患為人子者所當深察也○南史何子平以兵饑未葬其母者八年晝夜號哭常如袒括之日事在小學之書當攷

親喪外除

日月已竟而哀未忘

兄弟之喪內除

日月未竟而哀已殺○雜記

免喪之外行於道路見似目瞿聞名心瞿弔死而問疾
顏色戚容必有以異於人也如此而後可以服三年之
喪其餘則直道而行之是也

雜記○似謂容貌似其父母也

孟獻子禪縣而不樂比御而不入夫子曰獻子加於人
一等矣

入謂復寢○檀弓下同

伯魚之母死期而猶哭夫子聞之曰誰與哭者門人曰鯉也夫子曰其甚也伯魚聞之遂除之

子夏既除喪而見予之琴和之而不和彈之而不成聲作而曰哀未忘也先王制禮而不敢過也子張既除喪而見予之琴和之而和彈之而成聲作而曰先王制禮不敢不至焉

檀弓○見謂見孔子

魯人有朝祥而暮歌者子路笑之夫子曰由爾責於人

終無已夫三年之喪亦已久矣夫子路出夫子曰又多乎哉踰月則其善也

以上言喪葬祥除其制度節文別見

父沒而不能讀父之書手澤存焉爾母沒而杯圈不能飲焉口澤之氣存焉爾

鄭氏曰孝子見親之器物在側不忍用也

曾皙嗜羊棗而曾子不忍食羊棗

朱子曰曾子以父嗜之父沒之後食必思親故不忍

食也

公孫丑問曰膾炙與羊棗孰美孟子曰膾炙哉公孫丑曰然則曾子何為食膾炙而不食羊棗曰膾炙所同也羊棗所獨也諱名不諱姓姓所同也名所獨也

南軒張氏曰曾子不忍食羊棗之意愛敬之篤不死其親者也親之所嗜見之而不忍食焉推是一端則凡其日用之間所以感發於其親者多矣常人於其親日遠而日忘矣惟君子則不然親雖日遠而其心

不可泯也故雖事事物物之間親心之所存吾亦存之未嘗忘而況於其言行乎此之謂不死其親或曰屈到嗜芰於其終也命家老我死必薦芰而屈建命去之然則非邪蓋於親之所嗜而不忍食此其愛親之心也至於祭祀則有常物事親之禮不可以素建不敢以私意事其親而祭之以禮未為失也然使建也而能體會子不食羊棗之意則其不薦也義固當然其精微曲折之間必更有以處者觀其命去之

辭則傷於大勁而於親愛亦未免為有害也

子曰父在觀其志父沒觀其行三年無改於父之道可謂孝矣

朱子曰父在子不得自專而志則可知父沒然後其行可見故觀此足以知其人之善惡然又必三年無改於父之道乃見其孝不然則所行雖善亦不足為孝矣○尹氏曰如其道雖終身無改可也如其非道何待三年然則三年無改者孝子之心有所不忍故

也游氏曰三年無改亦謂在所當改而可以未改者耳或問此章之指猶有可取者乎曰晁氏洪氏之說亦善晁氏曰三年無改於父之道此觀行之一節也洪氏曰父沒雖可以行其志然改父之道於三年之中則無愛親之心而其行亦不足觀矣曰所取尹游之說何也曰尹氏得其用心之本游氏得其制事之宜二說相須為不可易矣曰必若尹游之說則夫子之說得無有不盡者乎曰為人子者本以守父之道

不忍有改為之心至其所遇之不同則隨其輕重而
以義制之耳三年而改者意其有為而言也其不可
改則終身不改固不待言其不可以待三年者則又
非常之變亦不可以預言矣善讀者推類而求之或
終身不改或三年而改或甚不得已則不待三年而
改顧其所遇之如何但不忍之心則不可無耳或曰
昔謝方明承前代人不易其政其必宜改則以漸變
之使無迹可尋為人子者不幸而父之道有當必改

者以是為法而隱忍遷就於理義之中不亦可乎曰
吾嘗聞之師曰以為此其意則固善矣然用心每每
如此即駸駸然所失多矣若不得已但當至誠哀痛
以改之而已何必隱忍遷就之云乎至哉此言足以
倣學者用心之微矣○南軒曰舊說以為父在能觀
其志而承順之父沒觀其行而繼述之此說文理為
順按二先生之說不同姑兩存之

曾子曰吾聞諸夫子孟莊子之孝也其他可能也其不

改父之臣與父之政是難能也

朱子曰孟莊子魯大夫名速其父獻子名蔑獻子有
賢德而莊子能用其臣守其政其他孝行雖有可稱
皆不若此事之為難○或問鄧子之說如何曰鄧氏
之言曰獻子歷相三君五十年魯人謂之社稷之臣
則其臣必賢其政必善矣莊子年少嗣立又與季孫
宿同朝宿父文子忠於公室宿皆不能守而改之莊
子乃獨能不改其父之臣與父之政而終身焉是孔

子之所謂難也若父之臣與父之政有不善則是成其父之惡耳惡得為孝哉

子云君子弛其親之過而敬其美

鄭氏曰弛猶棄忘也孝子不藏識父母之過

論語曰三年無改於父之道可謂孝矣

不以已善駁親之過○坊記○以上言無改父道之孝按書蔡仲之命爾尚蓋前人之愆惟忠惟孝人子不幸如大禹之承鯀蔡仲之承蔡叔又當思所以蓋

之故治水功成而鯀配夏郊率德改行而蔡仲世紀豈非孝之大乎後世如沈充叛臣也其子勁以死節著李義府姦臣也其子湛以忠義聞若勁與湛可謂能蓋其父之愆矣○又穀梁傳孝子成父之美不成父之惡故魏顓從治命君子是之魯隱與桓春秋弗取是亦不可不知也

論語祭如在祭神如神在

程子曰祭祭先祖也祭神祭外神也祭先主於孝祭

神主於敬朱子曰此門人記孔子祭祀之誠意

子曰吾不與祭如不祭

朱子曰又記孔子之言以明之言已當祭之時或有故不得與而使他人攝之則不得致其如在之誠故雖已祭而此心歉然如未嘗祭也○范氏曰君子之祭七日戒三日齋必見其所祭者誠之至也是故郊則天神格廟則人鬼享皆由已以致之也有其誠則有其神無其誠則無其神可不謹乎吾不與祭如不

祭誠為實禮為虛也

曾子曰慎終追遠民德歸厚矣

朱子曰慎終者喪盡其禮追遠者祭盡其誠民德歸厚謂下民化之其德亦歸於厚也

禮記曰霜露既降君子履之必有悽愴之心非其寒之謂也春雨露既濡君子履之必有怵惕之心如將見之鄭氏曰皆謂感時念親也霜露既降禮說在秋此無秋蓋脫爾○祭義下同

致齋於內散齋於外齋之日思其居處思其笑語思其志意思其所樂思其所嗜齋三日乃見其所為齋者

程子曰凡祭必齋齋之日思其居處思其笑語此孝子平日思親之心非齋也齋不容有思有思則非齋三日見其所為齋者此非聖人語齋者湛然純一方能與鬼神接能事鬼神此是上一等人

祭之日入室僾然必有見乎其位

僾然微見貌

金匱要略 卷十一
周還出戶

謂專設時

肅然必有聞乎其容聲出戶而聽愾然必有聞乎其嘆息之聲

無戶者闔戶若食間則有出戶而聽之

是故先王之孝也色不忘乎目聲不絕乎耳心志嗜欲不忘乎心致愛則存致慤則著著存不忘乎心夫安得不敬乎君子生則敬養死則敬享思終身弗辱也

唯聖人為能饗帝唯孝子為能饗親

鄭氏曰謂祭之能使之饗也

饗者鄉也鄉之然後能饗焉

言中心鄉之乃能使其祭見饗

文王之祭也事死者如事生思死者如不欲生忌日必哀稱諱如見親祀之忠也如見親之所愛如欲色然其文王與

鄭氏曰思死者如不欲生言思親之深也如欲色者

以時人於色厚假以喻之

詩云明發不寐有懷二人文王之詩也祭之明日明發不寐饗而致之又從而思之祭之日樂與哀半饗之必樂已至必哀

坐不寐謂夜而至旦也祭之日謂繹日也言繹之夜不寐也二人謂父母

孝子將祭慮事不可以不豫比時具物不可以不備虛中以治之

此時猶先時虛中不兼念餘事

宮室既修牆屋既設百物既備夫婦齋戒沐浴盛服奉承而進之洞洞乎屬屬乎如弗勝如將失之其孝敬之心至也與薦其樽俎序其禮樂備其百官奉承而進之於是諭其志意以其恍惚以與神明交庶或饗之庶或饗之孝子之志也

諭謂使祝祝饗及侑尸也或猶有也想見其彷彿來孝子之祭也盡其慤而慤焉盡其信而信焉盡其敬而

敬焉盡其禮而不過失焉進退必敬如親聽命則或使之也

如居父母之前將受命而使之

孝子之祭可知也其立之也敬以詘

詘充詘形容喜貌也

其進之也敬以愉

謂進血腥

其薦之也敬以欲

薦之謂進熟欲婉順貌

退而立如將受命已徹而退敬齊之色不絕於面
父母既沒必求仁者之粟以祀之此之謂能終孝子將
祭祀必有齊莊之心以慮事以具服物以修宮室以治
百事及祭之日顏色必溫行必恐如懼不及愛然

鄭氏曰如懼不及見所愛然

其奠之也容貌必溫身必誦如語焉而未之然
如有所以語親而未見答

宿者皆出其立卑靜以正如將弗見然

宿者皆出謂賓助祭者事畢出去也如將弗見然祭事畢而不知親所在思念之深如不見出也

及祭之後陶陶遂遂如將復入然

思念既深如覩親將復入也陶陶遂遂相隨行之貌是故慤善不違身耳目不違心思慮不違親結諸心形諸色而術省之孝子之志也

術為當作述

夫祭者非物自外至也自中出生於心也心怵而奉之以禮是故唯賢者能盡祭之義賢者之祭也必受其福非世之所謂福也福者備也備者百順之名也無所不順之謂備言內盡於已而外順於道也忠臣以事其君孝子以事其親其本一也

祭統下同

孝子之事親也有三道焉生則養沒則喪喪畢則祭養則觀其順也喪則觀其哀也祭則觀其敬而時也盡此

三道者孝子之行也既內自盡又外求助昏禮是也故國君取夫人之辭曰請君之玉女與寡人共有敝邑事宗廟社稷此求助之本也夫祭也者必夫婦親之所以備外內之官也

及時將祭君子乃齊齊之為言齊也齊不齊以致齊也防其邪物託其嗜欲耳不聽樂故記曰齊者不樂言不敢散其志也心不苟慮必依於道手足不苟動必依於禮是故君子之齊也專致其精明之德也故散齊七日

以定之致齊三日以齊之定之之謂齊齊者精明之至也然後可以交於神明也

君子之祭也必身親涖之有故則使人可也

張子曰事親奉祭豈可使人為之

君子將營宮室宗廟為先廡庫為次居室為後凡家造祭器為先犧賦為次養器為後無田祿者不設祭器有田祿者先為祭服君子雖貧不粥祭器雖寒不衣祭服為宮室不斬於丘木

曲禮○鄭氏曰廣敬鬼神也粥賣也丘壠也○又按
程子曰冠昏喪祭禮之大者今人都不理會豺獾皆
知報本今士大夫多忽此厚於奉養而薄於先祖甚
不可也某嘗修六禮大畧家必有廟廟必有主月朔
必薦新時祭用仲月冬至祭始祖立春祭先祖季秋
祭禰忌日迎主祭於正寢凡事死者皆當厚於生者
人家得此數件雖幼者可使漸知禮義

大夫祭器不假祭器未成不造燕器

王制○以上言祭享大意其始死之奠與虞祔練祥時祀之儀別見○又程子家治喪不用浮屠在洛亦有化之者司馬氏闢之尤嚴然彼之教得行由吾之禮先廢使今之居喪者始死有奠朔有殷奠虞祔祥禪皆有祭既足以盡人子追慕之情則於世俗之禮且將不暇為之矣不復祭禮而徒曰勿用浮屠使居喪者倻倻然無以報其親未見其可也

君子有終身之喪忌日之謂也忌日不用非不祥也言

夫日志有所至而不敢盡其私也

祭義○鄭氏曰忌日親亡之日忌日者不用舉他事
如有時日之禁也○近世大儒有忌日以黻巾墨衰
受弔者或疑之答曰禮不云君子有終身之喪乎前
世名家嫁女其篋中有墨衰一稱以為忌日慰舅姑
之服皆可法也○又程子曰人無父母生日當倍悲
痛更安忍置酒張樂以為樂若具慶者可矣愚謂人
子之於生日苟無父母當以忌日之禮自處唐太宗

以萬乘之主能行之況學者而可昧此乎故附於忌日之下

曾子有疾召門弟子曰啓予足啓予手詩云戰戰兢兢如臨深淵如履薄冰而今而後吾知免夫小子

朱子曰曾子平日以為身體髮膚受之父母不敢毀傷故於此使弟子開其衾而視之戰戰恐懼兢兢戒慎臨淵恐墜履冰恐陷也曾子以其所保之全者示門人而言其所以保之之難如此至於將死而後知

其得免於毀傷也○程子曰君子曰終小人曰死君子保其身以沒為終其事也故曾子以全歸為免矣尹氏曰父母全而生之子全而歸之曾子之啓手足為是故也○范氏曰身體猶不可虧也況虧其行以辱其親乎○曾子奉持遺體無時不戒慎恐懼直至啓手足之時方得自免這箇身已直是頃刻不可自安如所謂孝非止尋常奉事而已念慮之微有毫髮差錯便是悖理傷道便是不孝只看一日之間內而

思慮外而應接事物這箇心畧不檢點便差失了至危者無如人心所以曾子常常恁地戰戰兢兢如臨深淵如履薄冰。朱子語

禮記曰父母雖沒將為善思貽父母令名必果將為不善思貽父母羞辱必不果。內則

曾子曰身也者父母之遺體也行父母之遺體敢不敬乎居處不莊非孝也事君不忠非孝也涖官不敬非孝也朋友不信非孝也戰陳不勇非孝也五者不遂哉及

於親敢不敬乎亨熟羶薌嘗而薦之非孝也養也君子
所謂孝也者國人稱願然曰幸哉有子如此所謂孝也
已衆之本教曰孝其行曰養養可能也敬為難敬可能
也安為難安可能也卒為難父母既沒慎行其身不遺
父母惡名可謂能終矣

祭義下同○南軒張氏曰必如曾子全而歸之然後
可謂之能終而世之昧者顧以富貴利達為足以顯
其親曾不知枉道苟得戕賊天性莫此之甚而負乘

播惡恥加遺體若撻市朝其得失為何如哉是則行
身以其道則雖處貧賤而其所為事親者未嘗不得
不以其道則雖窮富極貴而所為辱親者益以滋甚
矣

樂正子春下堂而傷其足數月不出猶有憂色門弟子
曰夫子之足瘳矣數月不出猶有憂色何也樂正子春
曰善如爾之問也善如爾之問也吾聞諸曾子曾子聞
諸夫子曰天之所生地之所養無人為大父母全而生

之子全而歸之可謂孝矣不虧其體不辱其身可謂全矣故君子頃步而不敢忘孝也今予忘孝之道予是以有憂色也壹舉足而不敢忘父母是故道而不徑舟而不游不敢以先父母之遺體行殆壹出言而不敢忘父母是故惡言不出於口忿言不反於身不辱其身不羞其親可謂孝矣

程子曰士大夫受職尚期盡其職事况受身於父母安可不盡其道按此亦歸全之義

孟子曰事孰為大事親為大守孰為大守身為大不失其身而能事其親者吾聞之矣失其身而能事其親者吾未之聞也

朱子曰守身持守其身使不陷於不義也一失其身則虧體辱親雖日用三牲之養亦不足以為孝矣孰不為事事親事之本也孰不為守身守之本也

事親孝則孝可移於君順可移於長身正則家齊國治而天下平

孟子曰世俗所謂不孝者五惰其四肢不顧父母之養一不孝也博奕好飲酒不顧父母之養二不孝也好貨財私妻子不顧父母之養三不孝也從耳目之欲以爲父母戮四不孝也好勇鬪狠以危父母五不孝也

以上言謹身乃孝之終也或問父母既終如何行孝
武夷胡氏曰何嘗一步離其言有味故附此

曾子曰樹木以時伐焉禽獸以時殺焉夫子曰斷一樹殺一獸不以其時非孝也

此章又以一事未善皆非所以為孝孝又非但謹身而已

公孫丑曰君子之不教子何也

朱子曰不親教也

孟子曰勢不行也教者必以正以正不行繼之以怒繼之以怒則反夷矣夫子教我以正夫子未出於正也則是父子相夷也父子相夷則惡矣

夷傷也教子者本為愛其子也繼之以怒則反傷其

子矣父既傷其子子之心又責其父曰夫子教我以正道而夫子之身未必自行正道則是子又傷其父也

古者易子而教之

易子而教所以全父子之恩而亦不失其為教

父子之間不責善責善則離離則不祥莫大焉

王氏曰父有爭子何也所謂爭者非責善也當不義則爭之而已矣父之於子也如何曰當不義則亦戒

之而已矣

又曰章子子父責善而不相遇也

匡章齊人上文公都子曰匡章通國皆稱不孝焉夫子與之遊又從而禮貌之敢問何也孟子曰世俗所謂不孝者五云云章子有一於是乎


責善朋友之道也父子責善賊恩之大者

賊害也朋友當相責以善父子行之則害天性之恩也○此章言父子不責善子之諫父已見前幾諫等

章父之不教子獨見於此然則子有未善一付之師友而父不問焉可乎曰父未嘗不教子也鯉趨而過庭孔子告之以學詩學禮此非教而何特不深責以善耳然君子之教以身不以言故公明宣學於曾子三年不讀書曾子曰宣而居參之門三年不學何也公明宣曰安敢不學宣見夫子居庭親在叱咤之聲未嘗至於犬馬宣說之學而未能宣見夫子之應賓客恭儉而不懈惰宣說之學而未能宣見夫子之居

朝廷嚴臨下而不毀傷宣說之學而未能宣安敢不
學而居夫子之門乎古之君子其以身教也如此豈
必諄諄然命之而後謂之教耶夫子教我以正而夫
子未出於正此正以言教不以身教之罪也說苑曰
父母正則子孫孝慈孔子家兒不識怒曾子家兒不
識罵為人父者其可不知此義邪

右明父子之親



西山讀書記卷十一